

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Une mostre a Cormòns fin ai 2 di Zenâr te sede de 'Società Cormanese Austria'

Cormòns al torne a scuvierzi Ermete Zardini.

E lu fâs in grazie de "Società Cormanese Austria", che i à dedicât inte sede di vie Matteotti une mostre dai siei quadris e dai siei dissens.

Zardini, pitôr e poete, al jere nassût a Cormòns tal 1868 e al à vivût a plen a cjalval jenfri il Votcent e il Nûfcent: al à vivût simpri sot la ombre dal Quarin e al muri tal 1940.

Al à vût fat diviers lavôrs, ma la sô grande passion e je simpri stade la piture.

A la piture si è dedicât dopo des gnocis, une volte finide la vuere.

La sô ativitât e je stade une vore ferbinte in particolât tai agns jenfri il 1923 e il 1935: al à lassâts sù par jù 300 quadris e uns 60 dissens.

Al veve miôr piturâ lis gleseutis de Subide, di San Quarin, Sante Fosce, San Zuanut, Sante Polonie, lis piçulis anconis solitariis, la place di Cormòns intitulade ai 24 di Mai – massime tes zornadis di marcjât – cierts internis de Plazute e di Borc San Zuan.

Cun di plui i plasevin cierts viodudis dal Judri tal dulintor di Vilegnove o di



ERMETE ZARDINI INTUN RITRAT DI GIUPPI GRINOVER (1933)



IL MARCJÂT DI CORMONS

Cuadris e dissens di Ermete Zardini

Brezzan, la fontane dal Faèt, cualchi vecje cjase sul Quarin. Ma al à piturât ancje viodudis de lagune

e temis religjôs. Si è dedicât ancje ai dissens in blanc e neri che nus permetin di viodi lis trasformazions di Cormòns inte urbanistiche, lis sôs tradizions, i struments musicâi e l'origin dal so steme.

In plui che pitôr, al è stât ancje poete e al scriveve tal furlan di Cormòns. Lis sôs poesis, cetantis cuntune ponte di ironie, a son stadis racueltis intun libri vignût fûr sot dal pseudonim di Tite Robul, tal 1926, e tornât a stampâ tal 1957: "Un pòs di ratais in furlan cormonsês". Al è masse timp che Zardini al è colât in dismentie, ancje se la citât di Cormòns i

à intitulade une strade. Tal 1994 il Comun, in colaborazion cu la Societât Filologjiche Furlane, i veve dedicât un libri par cure di Eraldo Sgubin. Une opare impuartante, che e meteve in lûs dome la sô ativitât di poete, intant che inte mostre si puedin viodi ancje lis sôs

pituris e i siei dissens. La mostre si pues visitâle fin ai 2 di Zenâr di martars fin a domenie da lis10 a misdi e da lis 4 dopomisdî a lis 6 sotsera (sierât di lunis e tai dîs di Nadâl e Cjadalan).

Fr. Fem.

Percors bibliografic

In ocasion de mostre inmaneade a Cormòns, la nestre Biblioteche sociâl e propon un piçul percors bibliografic in linie su Tite Robul (Ermete Zardini), autôr di tantis poesis e pitôr, cun cualchidun dai tescj publicâts de Societât Filologjiche di podê lei e discjamâ in maniere libare a la direzion <http://www.filologicafriulana.it/percorsi-d-archivio/tite-robul/>

Augûrs

Ai letôrs di Friûl di Jevât e di Voce Isontina, us augurin di cûr bon Nadâl e bon principi dal 2022: che l'An gnûf al piart a ducj salût, pàs e ogni ben.

La Societât Filologjiche Furlane

Cu l'Issr di Gurize e la Associazion culturâl bisiache

Convenzioni pe valorizazion digjitâl dal patrimoni culturâl dal Gurizan

La Societât filologjiche furlane e à firmât dôs convenzioni, cu la Associazion culturâl bisiache e cu l'Istitût di storie sociâl e religjose di Gurize, pe valorizazion digjitâl dal patrimoni culturâl dal Gurizan.

Lis convenzioni, che a son stadis firmadis dai presidents Federico Vicario e Ivan Portelli, a previodin di digjitalizâ e cjamâ in linie rivistis e libris publicâts di bande dai doi istitûts lisuntins di culture.

In particolâr, l'acuardi jenfri la Associazion culturâl bisiache e la



Filologjiche al jentre tal progjet "Cultura in rete", finanziât de Region Autonome Friûl Vignesie Julie cun fonts statâi dal Ministeri dal Lavôr e al previôt la digjitalizazion par intôr de riviste "Bisiacaria", che e jentrarà tal sît des Rivistis Furlanis (www.rivistefriulane.it), e de schirie dai "numars unics" dedicâts ai paîs dal Tiritori publicâts in ocasion dai congress de ACB. O fevelin in dut di passe 5.200 pagjinis, par un total 522 articui.

La convenzion jenfri l'Istitût di storie sociâl e religjose di Gurize e la Filologjiche e jentre invezeit drenti dal progjet "Identità Culturale del Friuli", che al cjape drenti i istitûts culturâi plui impuartants dal Friûl. In grazie di chest progjet a saran a disposizion dai utents dal web cetancj libris publicâts dal ISSR, che dispès no si ju cjate ator, par esempli i trê volums "I cattolici isontini del XX secolo" o i libris su lis culturis tal Gurizan, o chei sul vescul Carlo Michele d'Attems e tancj altris ancjemò. Ancje in chest câs o fevelin di passe 5.000 pagjinis.